

臺灣光復五十週年紀念碑文

臺灣雄峙海東，拱衛南疆，屏藩閩粵，其地古屬禹貢揚州之域，載籍言之詳矣。上古之世，先民聚族而居，射飛逐走，擊壤而歌，不識帝力為何有。元、明而後，斯土漸啟，族群攜手奮鬥，斬荊棘，拓沃野，以奠子孫千秋萬世安居樂業之基，尤以延平郡王志切中興，率師東渡，驅荷復土，厥功偉矣。迨有清一代，文物典章，燦然大備，兼之運會所趨，地位愈形重要，光緒甲午，中日釁起，清師敗績，割地賠款，臺灣乃淪於日人之統治，五十年間，有志之士，揭竿競起，草澤群雄，喋血於前，文化菁英，奮臂於後，其民族精神之展現，並足以驚天地而泣鬼神。所幸剝盡而復、否極泰來，全國軍民，八載抗戰，民國三十四年，終見合浦珠還，海甸重光。臺灣光復伊始，百廢待舉，我政府堅守勵精圖治信念，丕展民主憲政宏猷，上下一心，慘澹經營，乃克底於成，舉凡土地制度之改

革、工商經濟之起飛、國民教育之普及、社會福利之施行等，皆其
犖犖大者，民眾利賴尤多，「臺灣奇蹟」之美名，遂蜚騰於國際，
歲月不居，半世紀忽焉已過，際此佳辰，各界之歡忻鼓舞，固不異
乎當年，然緬懷往昔，自不能無源頭活水之思，今歲臺灣光復五十
週年之慶，且建臺灣歷史文化園區民俗文物館、史蹟源流館，爰就
園區勒石，以資紀念，用示不忘匡復故土之艱難也。楚瑜以臺灣歷
史文化之彰顯，溯其源，探其流，永垂鏡鑑，與夫建碑誌盛，誠殊
途而同歸，願與全體省民，共勉勤勞，恭敬梓桑，忠愛邦國，淬礪
奮發，再締新猷，同沐無疆之休。

臺灣省省長 宋 楚 瑜



謹誌

中華民國八十四年十月二十五日